



01
768

Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 11-06/03-34-58637-~~182~~26
Sarajevo, 24. 02. 2026. godina

KANTON SARAJEVO
SKUPŠTINA KANTONA SARAJEVO

n/r Elvedin Okerić, predsjedavajući Skupštine Kantona Sarajevo
- ovdje-

PREDMET: Odgovor na zastupničku inicijativu; dostavlja se

Poštovani,

u Ministarstvo za odgoj i obrazovanje Kantona Sarajevo (u daljem tekstu: Ministarstvo) dana 03.02.2026. godine zaprimljena je zastupnička inicijativa zastupnica Admele Hodžić, broj 01-04-58637-58/25 od 03.02.2026. godine, a koja se odnosi na sistemsko uređenje međunarodnih takmičenja učenika osnovnog i srednjeg obrazovanja u Kantonu Sarajevo, kao i status njihovih mentora.

Ministarstvo u potpunosti prepoznaje značaj međunarodnih takmičenja kao važnog segmenta razvoja izvrsnosti, afirmacije nadarenih učenika te promocije Kantona Sarajevo i Bosne i Hercegovine u međunarodnom obrazovnom prostoru. Rezultati koje učenici ostvaruju na međunarodnim olimpijadama i drugim prestižnim takmičenjima predstavljaju izuzetan uspjeh za same učenike i njihove mentore, ali i potvrdu kvaliteta odgojno-obrazovnog sistema Kantona Sarajevo.

Oblast takmičenja učenika u Kantonu Sarajevo normativno je uređena kroz Pedagoške standarde i normative za osnovno i srednje obrazovanje, Kalendar takmičenja koji se donosi na godišnjem nivou, kao i relevantne odredbe Kolektivnog ugovora za djelatnost srednjeg obrazovanja („Službene novine Kantona Sarajevo“ broj: 38/22, 47/22, 28/23, 31/23, 7/24, 39/24 i 17/25) i Kolektivnog ugovora za djelatnosti predškolskog odgoja i osnovnog odgoja i obrazovanja u Kantonu Sarajevo („Službene novine Kantona Sarajevo“, broj: 24/22, 40/22, 7/24, 39/24 i 17/25). U oba kolektivna ugovora definisano je sljedeće:

„Novčane nagrade iz st. (1) i (2) ovog člana se isplaćuju onda kada su takmičenja, smotre, javni nastupi i konkursi: a) realizirani u organizaciji Ministarstva, b) planirani Godišnjim programom rada ustanove, koji je odobren od strane Ministarstva ili c) realizirani u organizaciji stručnih udruženja, asocijacija i međunarodnih organizacija, ali pod uslovom da su prethodno odobreni od strane

Ministarstva kao takmičenja, smotre, javni nastupi i konkursi za koje su predviđene novčane nagrade u skladu s ovim članom.“

Citirana odredba potvrđuje da se novčane nagrade mogu isplaćivati samo za takmičenja koja su prethodno normativno definisana i odobrena, odnosno uvrštena u zvanični sistem takmičenja koji se konkretizuje kroz godišnji Kalendar takmičenja.

Kalendar takmičenja, koji se donosi na godišnjem nivou, predstavlja jedinstven i transparentan dokument kojim su jasno definisana takmičenja koja čine zvanični sistem takmičenja u Kantonu Sarajevo. Upravo kroz taj dokument osigurava se plansko praćenje, jednak tretman svih učenika i mentora, kao i odgovorno upravljanje javnim sredstvima. Uvođenje dodatnih oblika nagrađivanja izvan postojećeg normativnog okvira, bez prethodne systemske razrade i usklađivanja sa budžetskim i pravnim propisima, dovelo bi do narušavanja principa jednakosti i pravne sigurnosti.

Posebno naglašavamo da međunarodna takmičenja, po svojoj prirodi, nisu u organizaciji Ministarstva, već međunarodnih asocijacija i drugih organizatora, te je uloga Ministarstva prvenstveno usmjerena na uspostavljanje jasnog normativnog i institucionalnog okvira, kao i pružanje podrške u skladu sa važećim propisima i budžetskim mogućnostima.

Imajući u vidu raznovrsnost međunarodnih takmičenja, od zvaničnih olimpijada sa višestepenom selekcijom i državnim reprezentativnim timovima, do takmičenja u organizaciji različitih privatnih i nevladinih subjekata, neophodno je zadržati diferenciran i stručno utemeljen pristup vrednovanju. Sistem mora počivati na jasnim kriterijima, provjerljivoj proceduri selekcije i vertikalnoj i horizontalnoj prohodnosti takmičenja, od školskog, općinskog i kantonalnog nivoa, preko federalnog i državnog, do međunarodnog nivoa. Samo takav kontinuitet osigurava objektivnost, transparentnost i kredibilitet postignutih rezultata.

U tom smislu, JU Institut za razvoj preduniverzitetskog obrazovanja Kantona Sarajevo, u čijoj je nadležnosti organizacija i praćenje takmičenja, kontinuirano prati stanje u oblasti međunarodnih takmičenja i razmatra mogućnosti unapređenja postojećih rješenja, vodeći računa o principima pravičnosti, održivosti i jednakog tretmana svih učenika i mentora.

Prijedlog formiranja posebnog fonda za izvrsnost, kao i druga rješenja koja imaju direktne fiskalne implikacije, zahtijevaju detaljnu analizu, precizno normativno definisanje kriterija, procjenu dugoročne održivosti i usklađivanje sa budžetskim okvirom i propisima o javnim finansijama. Takva pitanja ne mogu se rješavati parcijalno, već isključivo kroz systemska rješenja koja su jednako primjenjiva na sve učenike i sve oblike takmičenja.

Ministarstvo ostaje opredijeljeno za unapređenje rada s nadarenim učenicima i jačanje kulture izvrsnosti u obrazovanju, ali isključivo kroz jasno definisan, pravedan i održiv sistem koji osigurava jednakost, transparentnost i dugoročnu stabilnost obrazovnog sistema Kantona Sarajevo.

S poštovanjem,



Dostaviti:

1. Naslovu;
2. a/a.



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-128

Web: <http://mo.ks.gov.ba>, E-mail: mo@mo.ks.gov.ba